

Tumba 2014 dedica na Papito Rafael y Frenk Kock



ORANJESTAD (AAN)-Manera ya a wordo anuncia e aña aki Tumba Festival 2014 lo wordo dedica na dos gran persona cu trayectoria largo riba tereno musical. E dos personanan aki ta Papito Rafael y Frenk Kock.

Historia musical cortico di Papito Rafael

Ridnald Rafael (mihor conoci como "Papito") for di hoben tabata tin e ritmo den su sanger. Tempo di basisschool Papito ya caba tabata toca cu potlood riba banki den klas. Meneer y jufrouwnan constantemente mester a hala su atencion.

Papito a cuminsa su carera musical tocando cu un grupo di gaita cu tabata yama "Los Paranderos". Despues di esaki papito hunto cu integrantenan di e grupo di gaita, cual tambe tabata amigonan di barío di Dakota a lanta un banda cu yama "The Otty's". Despues cu "The Otty's" a kibra e integrantenan a lanta e banda "Version Original", cual tabata un banda mas formal cu tabata

tin hasta un brass section. Den e banda aki Papito tabata toca drumset, timbal y tambe e tabata canta.

Despues di "Version Original", Papito a sigui como un musico free-lance tocando cu diferente banda, entre otro "Los Condes", "Musical Time", "Sound & Harmony" y tambe na diferente di nos hotelnan.

Den e tempora aki Papito ainda tabata menor di edad, y tabata Sr. Joy Kock cu mester a busca Papito na su cas y asina cu caba di toca, mester hiba Papito bek cas. Den e tempo ey Papito tabata toca tambe cu e banda "Dedhalavie". Papito tabata val in pa su ruman Eric Rafael y tambe pa Dhaddy Brokke ora cu esakinan no tabata por a canta y of toca.

Despues di esaki Papito a bay Bonaire cu e banda "Los Condes". Den e mesun periodo aki e popular banda "Triple S" di e conocido musico Sonny Ho tambe tabata na Boneiro. E tocado di raspa di "Triple S" no a presenta y Sonny a pidi Papito pa val in tocando raspa. E banda "Triple S" a gusta con Papito a toca y nan a pidi Papito pa join nan, cual e tempo ey tabata e banda di momento na Aruba. Papito a forma parti di "Triple S" pa varios aña. Den e periodo cu Papito tabata forma parti di "Triple S" Papito a sa di cosecha hopi exito.

Despues cu "Triple S" a kibra, Papito hunto cu varios di e integrantenan a dicidi

di lanta un banda nobo cu e nomber "Papito y su Doble Sabor". Papito a dirigi e banda aki pa mas cu 12 aña. "Papito y su Doble Sabor" a sali varios biaha "Banda di Aña".

Papito ta bon conici tambe pa su forma di anima un fiesta. Hunto cu "Papito y su Doble Sabor", Papito a conquista e titulo di "Rey di Tumba" no menos cu 5 biaha. Papito a bira Rey di tuma 3 aña sigui, na 1993, 1994, 1995.

Na aña 1998 tambe Papito a bira rey di tumba y e ultimo biaha tabata e rey di tuma di milenio, esta na aña 2000.

Na 3 ocasion Papito a yega di cay den finalista di Calypso & Roadmarch Contest cu entre otro e cancion "Egyption Dance" y mas recien na aña 2003 cu Papito a sali 2do finalista cu e roadmarch "Changé".

Pa menciona un paar di cancionnan cu tabata hit di Papito cu e banda "Triple S" ta entre otro "Mala Mujer, Dialuna, Sangre de Vino". Cu Papito y su Doble Sabor ta su tumbanan di carnaval "Bagadi Bagada, Lolle Piet, Hala pa nos pasa, Aruba ta tembla y den Memei".

Papito su hitnan di mas grandi cu a causa furor tabata e temanan "Chobolobo" y "Manolo", cual temanan a hiba e banda na un gira di un luna largo na Europa, den cual Papito y su Doble Sabor a toca mano a mano cu e banda Doble R di Corsow y Trafasi, Enos y Pegasaya di Hulanda.